

四庫全書

集部

欽定四庫全書

倪文僖集卷五

明 倪謙 撰

古詩七言

題張中書子俊畫孤舟讀書圖為吳宗起賦

昨夜滄江雨初歇兩岸山屏翠煙疊江空浦極悄無人
但見小舟橫一葉舟人所適非取魚危坐船頭惟讀書
音聲琅琅出金石馮夷起舞舞鼉鼉趨蘭橈不舉隨流去

渚北汀南無定處只知兀兀了殘編不覺亭亭倚高樹
知君自是隱者流孤篷短棹輕王侯經年對語手中卷
鎮日忘機沙上鷗澹古先生青瑣客揮毫日保金門直
忽看高興落江湖却向烟波寫真逸王摩詰張志和畫
意詩情相蕩摩樵青篷底喚不醒西塞山前春雨多

上國觀光歌為沈侯官司倉用賓賦

能畫

袖有五色筆囊有萬言策筆可補造化策可干明辟纔
聞臯朔詣公車又見嚴徐向都邑奮志遙從上國遊扶

搖九萬搏脩翼日月明三殿虎豹守九闕玉帛會諸侯
梯航來百蠻金張甲第亘紫陌夔龍禮樂嚴清班光華
眼底觀不盡致身已在青雲間不慕綰金章不羨秉丹
轂自分草莽臣但足升斗祿東葛方容就督郵南閩復
許煩搜粟清曉君門開謁帝趨明光天仗建羽旄簫韶
儀鳳皇玉階稽顙荷恩出海嶠行覽三山蒼携壺送予
都門道晴日輝輝照芳草酒闌征旆逐薰風回首蓬萊
五雲繞

風雨歸庄圖為錢景和賦

陰雲蔽空如墨堆長風入林聲撼雷木葉驚飛水波湧
忽送一天山雨來山翁行行在中路急歸遠向溪橋度
破傘高擎稚子扶杖瘦泥深不能步到家入門呼老妻
快燒榾柮烘我衣

雪後山行圖為前人賦

深山雪後岩壑空槎牙古木號嚴風長溪流澌凍欲合
野徑時有行人通青驄裝重征途白三子懷冰凜寒色

鄉園何處渺羈愁歲晚天涯猶作客前村有酒不惜錢
冷氣直透三重綿

湖口石鍾山為庫部王郎中恕賦

彭蠡之口兩石鍾上下壁立金芙蓉何年鼓鑄出爐冶
造化融結當鴻蒙山靈昔聞訴真宰帝令疏鑿驅鬼工
雕鏤險陋向山麓空洞穴隙紛玲瓏鳴聲底用事撞擊
自有巨浪乘長風何殊張樂洞庭野大音迭奏聞金鑪
五老分明俯垂聽鏗鏘撼蕩馮夷宮爾來世歷千萬古

至今追蠡懸高空坡仙當年適臨汝沿洄南去路自通
平生好事此足見放棹特過湖水東明月夜抵絕壁下
怪石正與風濤衝嘈呿鏗鞳互響應寓目始得窮竒蹤
此景居民久應識口不能道嗟漁翁詩成援筆歎且笑
漢人語簡唐人庸我皇曾此戮鯨鱣攀崖上登山閣中
龍香落紙灑宸翰滄江夜夜光如虹憶昔皇華使荆楚
奈予王事方匆匆天生佳景不一到悵望思逐南飛鴻
王君舊隱此游衍要我作詩抒素胸不知夙願可償否

汎月來遊追長公

五龍圖為胡監丞題

我曾讀易披韋編乾龍飛躍當天淵神物變化不可測
千古惟聞爻象傳忽驚波濤捲虛壁真見羣龍紛糾纏
分明五色照雙眼崢嶸頭角爭蜿蜒鬚鬣擗張紫戟豎
睛瞳閃爍金鉦懸前拏後攫爪牙露左卷右舒鱗甲堅
居中夭矯更雄健簸弄明月驪珠負鬣身怒擊海水黑
噓氣瞑結陰雲立揮霍疑驅鬼神會淋漓訝與河漢連

乘潮欲掣鉅鰲足鼓浪正湧飢蛟涎鯨鯢喪膽深竄伏
鯢鵬矯翼遙騰騫陽侯馮夷駭且怖一吸愁將空百川
望中慘淡白日晦淒風颯颯來狂顛恍惚長空灑飛雨
霹靂破山揮電鞭噫嘻好手豈易得經營筆底何精專
奇形異狀恣揮寫直與造化工相宣想當盤礴何處見
禹門西上春風前僧繇已矣所翁死絕藝信足追前賢
古來好龍惟葉公君今志尚亦復然高堂懸此靜相對
坐覺窗戶生雲煙嗟哉粒食民所天旱暵每憂民瘠捐

便當叱起作霖去四海常令歌有年

母子虎圖為前人題

昔年曾侍朝元殿虎豹守闕龍馭輦鳳皇在數麟在郊
濟濟四靈俱入獻聖皇端拱垂衣裳大韶擊拊諧宮商
至和感召及羣物鳳儀獸舞爭趨蹌就中於菟引三子
炳炳文章妥其尾馴然拜跪伏闌圈天子見之心亦喜
一從宦轍走西東幾年不復見汝容良工筆態巧為此
將汝置之圖畫中目光射人威百步意氣揚揚甚虓武

一聲長嘯岩壑間疑有淒風振林藪舉頭高為城掉尾
長為旌生獍雖可畏猶識子母情一兒顧其母一兒跳
且舞一兒當母前相向得其所怡怡不見怒與嗔但覺
哺乳恒相親磨牙吞噬向百獸乃能骨肉全天真君不
見魏家良將初授鉞子肉遺之甘飽啜又不見廣武城
頭翁就烹一杯欲索分其羹何事人心忍為此爭如物
性仁恩明更憶弘農施代理爛斑渡河還負子胡為倉
卒棄吾兒天豈無知天不畀人言虎猛我言虎良母慈

子愛藹乎一堂曾參之養閔子孝對此為君歌慨慷

張廷端畫楚水推篷墨竹為鄭簿賢題

長竿半入空短竿如臥龍張氏之子筆意工題作楚水
推煙蓬蓬窓所見僅如許外此目力焉能窮想當倚棹
湘江渚密葉脩脩翠含雨中有鉤輶鷓鴣語隔岸何人
吹紫簫彩鳳迎風欲飛舉鄭虔之清如此君歲寒高節
更出羣并刀入手為持贈截取湘臯半畝雲

學士杯歌

并序

冬官陳進之雅好客予嘗訪之於官舍留予飲出一金盞
觴余形如珮環甚巨曰此盞予新制未有名也今得先
生至而始試之其遂名曰學士盃進之不善飲而好勸
客連飲予數盃酒酣彊予作學士盃歌因援筆以荅其意
歸與親朋觴酌間舉此杯歌此詩亦醉鄉之一樂也

精金百鍊方在鎔煖光燦燦飛晴虹一泓傾瀉紫液凍
鑪錘妙手資良工員不從規方不矩形若珮環深幾許
麴生歡伯每相投却付尊壘為伴侶冬曹陳君真好奇

製此絕勝金屈卮我來擎出便斟酌云是新成曾未持
謂余玉堂仙素有江湖量錦袍濕淋漓曾醉宮壺釀此
人正與此杯宜滿勸頻斟不容讓乃錫以嘉號名曰學
士杯杯惜以予辱予亦因杯顏何如喚起謫仙李一飲
一石襟懷開今君棹酒船歸向三江口高陽有舊徒總
是文章友舉杯吸盡甕中春吐出新詩千百首

淮之水輓山陽友義畢居士

淮之水去悠悠公逝矣不我留乘雲至帝鄉上挾飛仙

遊俯視下土方孰軫蒼生憂萬金不惜濟窮匱古亦罕
見今無儔淮之水波湜湜入人深公之德身榮章服維
民則子登甲科務學殖天之報施寧有極淮之水流無
已公之名垂後世高風杳邈徒仰止嗚呼九原安得起
一為哀歌歌義士

為易太守題日本僧所作田廬圖

在昔尋仙聞祖龍欲度弱水求瀛蓬徐生樓船載男女
滄溟遠汎將焉窮海洲駐節不復返至今有國扶桑東

君民舉國奉夷教詩書亦沾鄒魯風聖人在御重柔遠
梯航萬里車書通來賓重譯貢方物授館致餽思優隆
史臣筆底曉詞翰丹青繪事無能工始知文化洽殊俗
意匠彷彿荆關踪禮曹郎官青瑣客溪藤數幅陳南宮
名之放筆恣揮灑風景寫出江南同野橋百尺跨溪水
旗亭一簇依林叢長途策蹇過行旅隔岸騎牛來牧童
居民比屋事耕稼郊原禾黍方芄芄豈其經行寫所見
家山想是勞形容郎官出守分虎銅携圖謁我幽軒中

為言此畫非所重以出遠人聊見崇為君乘興寫長句
日華正照東窗紅

題松陰假寐圖歌

雲山萬疊深復深山根碧澗清人心幽人長夏忽來此
避暑坐愛蒼松陰坐來睡渴目雙瞑誰計斜陽在東嶺
如雷鼻息和泉聲風捲松濤吹不醒滿襟涼思寐正濃
吟魂縹渺隨天風不知清夢向何處但見據膝身如弓
華胥覽遍神應悅樂聽鈞天情更愜邯鄲只恐熟黃梁

漆園渾訝飛胡蝶南柯或為太守公腹上忽見生長松
仰天大笑墮驢後遊仙或臥蓮花峯天官筆韻含飛動
此幅尤為人所重披圖堪數古今人往事悠悠皆一夢

送楊洗馬京闈較藝還朝

先生自是文中豪魁名烺烺馳清朝早登翰苑閱中秘
尋入宮坊居上僚京闈多士如雲集聖主親煩司黜陟
經幄初辭講讀班詞垣暫輟絲綸筆乘傳南來半月程
深院下簾秋氣清掄材晴案寸心白批卷夜窗雙眼明

譽髦簡拔皆精確尺璧明珠光爛若佇充庭實獻彤墀
喜動龍顏承寵渥

泰山春雲圖歌

泰山雄跨齊魯東自古以來稱岱宗造化鍾神插天表
丈人日觀羅諸峯氤氲元氣互吞吐時見層雲生盪胸
觸石而起膚寸合頃刻瀰漫橫太空曾不崇朝雨天下
坐令四海歌年豐惟我藩垣老方伯仰韓素與茲山同
百萬蒼生屬摩撫熙熙共陟春臺中天瓢在手慰民望

一心默會神明通欲雲而雲雨而雨川嶽効靈無不從
仁恩洋溢洽東土噓枯起瘵甦疲瘵遙望春雲蔽岩壑
官舍坐對心神融頓使移來在窓几筆端意匠資良工
山藏雲氣自叢葉雲連山色常溟濛只今春雲滿瓊島
悠揚日護蓬萊宮久待公來作天瑞輪囷繁爛昭時雍
會當乘之起東海直至天門之九重文明有象衆咸睹
五色夾日隨飛龍

大藤賊謠

并序

東莞陳君敏任廣西平南訓導成化改元春大藤峽有賊焚劫縣治擄君及妻王妾孫十數口去駐鹿兒山王訴於賊言夫親老乞釋歸養取銀收贖賊從之乃屬夫曰但贖女以出縱贖吾出亦無顏見人也比賊起營入峽堅執不行王與孫皆被害君收其遺骸葬之鶴塘縉紳表曰賢烈茲君來教京衛武學予聞其事傷其抱節而死足以勵婦德也為作大藤賊謠以哀之

天地有沴氣鍾此大藤賊峽深路復險憑恃為窟宅稟

性若豺虎吞噬乃其德官軍不能制時出寇城邑成化
改元乙酉春賊入平南燒縣門人財驅劫如豕奔羣聚
鹿兒山下存嗟哉儒宮陳廣文傳經講習師道尊一家
妻女十數口同時被擄罹妖氛厚邀金帛贖性命殺人
為戲輕雞豚陳君有妻王義不受賊辱訴賊釋夫養父
母語夫攜金將女贖一身自分不苟活夫女得歸甘瞑
目賊入峽紛起營迫王去堅不行賊怒殺之妾亦殞生
二婦並貞烈照映冰壺清千秋萬春揚令名安得上帝

遣六丁下剽壘嶂如砥平賊失所恃無欺凌夫婦相保
民永寧

悲哉雙鳳皇吟

東莞陳公世珍從戎於蘆重義輕財樂於周卹人以德
公稱之成化改元秋城為廣西流賊所破公與妻胡氏
皆被擄驅至大虫埠孫貴攜金往贖遇他賊奪而殺之
賊議欲釋其一公夫婦哭讓不忍舍遂皆被害其子平
南訓導敏求得屍歸葬之蘆城鶴塘茲敏來教京衛武

學言其二親死於非命為之傷痛不已乃作悲哉雙鳳
皇吟以哀之

悲哉雙鳳皇雙棲復雙翔雄鳴雌應之雖離向梧岡覽
德一出為世祥翼覆百鳥無羸庭豈知羣梟夜突出肆
侮驅逐離故藏山深醜類多搏啄毛羽傷何異魯郊麟
頓踣遭鉏耒商雙鳳皇良可悲雌雄相讓不忍離雌為雄
死雄亦隨眼中見義不見害肯圖苟免虧天彝雙鳳皇
悲固極洒淚向天天亦泣鳳幸有孤雛文采備五色恨

不磔臬罔其奈弱無力含痛負鳳歸瘞之鶴塘側鵲兮
儀舜韶遠向天池集帝憐鳳義卹鵲孝會有天恩下褒
錫雙鳳皇悲罔極

玄都看花詩意圖

播州司馬南遷客萬里歸來頭尚黑玄都觀裏看花遊
千樹新桃好顏色劉郎初來花滿庭劉郎再來花盡零
隆替都來十四載眼中故舊如晨星撫時感事詩成後
佳句流傳在人口人生得喪等浮雲義命於人宜自守

嗟予去國亦有年披圖懷古心茫然
贏得閒身老林壑
一任晴春花競妍

夏太常半壑秋聲竹

太常夏卿鳳池客曾向鰲峯揮翰墨
興來愛寫青琅玕
頃刻毫端生秀色眼中此幅尤絕奇
籊籊縱抱冰霜姿
大竿凌雲勢直上小竿枝弱形斜欹
大竿小竿如玉削
飄蕭葉葉金刀錯
西風昨夜入中林
恍覺秋聲滿岩壑
疑君鼓棹遊湘川
兩岸修篁搖翠煙
蒼梧望斷滴風雨

筆底閑將幽思傳又疑推蓬向淇澳猗猗滿地瞻新篆
醉將筠管掃煙梢似惜佳人在空谷當年湖州妙入神
意趣所到皆通真免起鵲落有遺法異世接武卿其人
念我平生性孤潔重此清風與高節展圖一見爽心神
涼襲衣襟灑蒼雪掛君高堂絕點埃紫簫好備伶倫裁
月明試弄參差琯應引和鳴栖鳳來

十六日與學士錢公亞卿章公會飲於崔都閫宅
賦此以謝

龍蟠虎踞金陵邑佳麗繁華稱自昔萬戶笙歌多宴集
況乃更遇燒燈夕崔侯好客慕三益繡幕高張展瑤席
邀我三人飲瓊液三人宦跡久離羣一朝會合交歡忻
我侯好武兼好文明時仗劍期策勲華燈照座凝火雲
麝蘭香靄揚清芬欲歌湛露過夜分只今四海無兵戈
聖主在上玉燭和年豐時泰黍稷多彈絲吹竹宛轉歌
迴風舞袖紛婆娑東君手持金巨羅如此不樂將如何
訪盧大叅莊所次錢學士短歌

東郊遊賞情難盡獨有廬莊占佳勝不辭路遠訪幽居
門枕膏腴麥苗盛我公自是天池鱗讀禮暫為林下人
繞廬綠樹作儔侶入戶青山成友賓烹鮮命酒忘歸去
村徑還諳舊來處好鳥留人不住啼垂楊馬首蒼煙低
題竹壽太常李先生立之

乙未五月十二日乃是太常先生之誕辰肯堂獻壽寫
綠玉薰風滿座清無塵高堂四壁懸長幅我獨愛此看
不足眉壽應期衛武同滿勸霞觴詠淇澳先生美質玉

粹溫步玉早登金馬門只今容臺挺高節葉葉雨露涵
天恩一片歲寒心千古簫韶意老去終為清廟器虞廷
九奏鳳來儀好協至和鳴盛世飄飄正帶凌雲氣

萱草圖為吳元玉題

吳家堂前春日杲光照幽蘭與萱草蘭萱開作黃金花
母心忘憂顏不老阿母看花開壽眉香風滿座春晝遲
金鰲突兀出滄海扶疎掛罨珊瑚枝花前稱觴獻阿母
膝下佳兒綵衣舞佳兒已作水部郎喜看祿養榮三釜

佳兒與佳婦日日娛堂前萱花倚慈竹色與蘭爭妍一
片心如寸草微仰視白日當空懸阿母年年在好花歲
歲開慈顏比花花不如秋霜不到堂中來曾聞鄒衍谷
吹律和氣復何似君家壽域中萬彙融融光奪目為母
一奏長春曲


題月夜鳴琴圖為莊知州賦

空山無人秋夜涼銀河熒熒流月光蒼龍百尺落松影
松梢露滴沾衣裳幽人中夜耿不寐起抱絲桐幽思長

坐據苔石不知冷橫膝對月調宮商山高水深趣未已
誰其知者同徜徉七絃不盡太古意下聽獨有仙娥婦
調高餘響振山谷啼鳥驚起爭飛翔夜深欲鼓廣陵散
斜月半落山蒼蒼呼童抱琴且歸去淨掃白雲眠石牀
題山水圖為董英賦

煙嵐溟濛山萬疊根蟠古檜蚪枝結滾滾流泉何處來
激石穿崖浪飛雪竹林古洞深復深石牀露冷莓苔侵
洞口幽人橫素琴彈出步虛雲外音兩髯並坐如黃綺

山風吹衣淨如水間讀黃庭一兩篇滿地白雲飛不起
山深地僻人跡稀惟許仙家依翠微何當來訪赤松子
濯我塵纓臨石磯



倪文僖集卷五

欽定四庫全書

集部

倪文僖集卷八

六至

詳校官庶吉士_臣陳若霖

中書_臣劉源溥覆勘

總校官檢討_臣何思鈞

校對官編修_臣汪鏞

謄錄監生_臣李崇實

欽定四庫全書

倪文僖集卷六

明 倪謙 撰

律詩五言

顧維周以詩見寄因次其韻兼柬楊景通

憶別過梅暑
今看近麥秋
祇將詩遣興
還藉酒澆愁
氣吐雙龍劍
文成五鳳樓
可同楊伯起
相對說予不

送張都運還治

鳴珮曉朝天修程著去鞭馬蹄經海上鴈影落淮壙日
照千岩雪風飄萬竈煙梅羹待調鼎早晚謁甘泉

徵聘圖

避世非吾願恬居乃士操從知丘壑陋孰與廟堂高天
上來纁幣林間集鴈羔祇應謝田里接武向夔臯

李文壁輓詩

號九川子年四十八卒

已矣九川子臨風增惋傷俄成蕉下鹿竟作井中桑宿
草秋迷塚陳編夕在床四枝丹桂好雲路看聯芳

題竹送吳僉憲赴湖湘

方岳選才良重煩出建章湛恩承曉露直節凜秋霜衣
繡過江表乘驄到漢陽臨歧無以贈交意托蒲相

送王克敬南還

乃雪坡公子母舅也

舅氏頭全白賢甥鬢亦蒼百年消幾別兩地詎能忘歸
興臨江渚離情在渭陽贈言欣滿卷珠玉照行裝

題廬山景

奇絕匡廬境芙蓉翠萬重雲迷白鶴觀日照紫煙峯虹

影懸晴瀑雞聲透曉鐘何當謝羈束林下散閒蹤

胡司訓輓章

子拱辰任御史號養拙病耳癸蛟峯

懸車多晚節振鐸仰餘風獨抱濂溪拙誰醫長史聾文

鵠

缺

白壁瘞蛟峯潛德書新刻虹光照墓松

贈姚惟聰江湖逸興詩

壯歲常為客飄飄類轉蓬山河千古在登眺幾人同雲
樹邊沙綠煙花入沛紅倚篷彈古劍目極大江東

寄上海李仲瀟知縣

上海有賢令九江文獻家長材
刀中竅清譽玉無瑕吏
靜常封印民安早放衙
謳聲聞百里傳誦到金華

賀劉中允父壽六十號松溪

我愛松溪叟賢聲聞海東
耳從今歲順顏勝去年紅
好客酒多貯陶情詩自工
遙知榮祿養壽與大椿同

送滑志庸楚府良醫

行人去武昌藥籠共詩囊
醫國馳清譽傳家有異方
雨中淮水白雲外楚山蒼
到日懸壺處應添杏幾行

希顏子林琚廷振挽詩

不折非為天君名久益新學徒希四勿年僅越三旬南
斗銷豐劍西郊踣魯麟斯文天已喪寧不為沾巾

志希顏氏子天不假之年徒抱為邦器曾無買柳錢卿
雲嗟易散白壁恨難全慶遺賢孫子儒風百代傳

送憲掾趙綱歸南昌

江南方溽暑何事獨言歸赤日齊紈扇清風越苧衣櫓
聲鳴鷺渚帆影掠漁磯萬里青冥闊行看一鶚飛

輓壽官趙公韞

九十應詔賜冠帶有榮
壽堂翠雲軒號聽鶴

榮壽人何在芝蘭播德馨
軒雲迷冷翠壠樹聳新青漢
詔優加級姪文特與齡九臯
遺怨鶴清唳有誰聽

次韻羅都憲歸老詩四首

解却都堂印紅塵百慮休
鄉心中夜枕宦況五湖舟已
遂林泉樂寧忘社稷憂
菊松三徑裏相過有羊求
故園風景好歸去樂無疑
濯足臨清泚充腸茹紫芝
金章違世寵黃髮繫宸思
會逐蒲輪起調元晚更宜

脫簪辭上國歸旆掠匡廬思已俞封疏名猶載璽書西
山朝氣爽南浦暮雲踈笑指門前路幽清水竹居
年未周花甲翩然拂袖塵高風追往哲全節見斯人柳
映陶庄晚棠遺邵陌春嗟予亦散吏惜別向江津

秋林寄傲

林下日夷猶蕭蕭黃葉秋乾坤雙白眼杖屨一蒼頭笑
看烏鳶嚇閒陪鹿豕遊閉門展書臥高枕亦何求

畊心軒

有地纔方寸多君用意耕
町畦無限隔壠畝自寬平
但覺荒蕪壑寧容稂莠生
百年惟種德孫子樂西成

愛溪詩為江右劉仲穆賦

環溪風景好遺愛在兒孫
載酒船猶繫垂綸石自存
常教高柳護忍使別流渾
無限羹牆感難忘罔極恩

胡大寧挽章

病目

涵素嗟何在逃名自得名
據梧常瞑目策杖每怡情
詩筆遺殘稿儒林冷舊盟
無慚郭有道曾誌鳳西塋

和同年話舊韻

浮生嗟命蹇宦海足風波去國憂方切還鄉幸已多
新恩來紫禁故道復黃河君德知難報華顛敢謂皤

禹門桃浪暖奮鬣早隨波流水年華速浮雲世變多
播遷依塞月湔滌挽天河但惜成衰老清霜入髩皤

清風來綺席尊酒綠生波訪舊情偏感論心話較多
浩懷魚縱壑佳會鵲填河信是同年友蕭蕭髮共皤

諸公抱奇節砥柱障頽波致主勲庸盛匡時事業多
麒麟

麟在靈囿龍馬出滎河我獨真駕劣妨賢媿鬢皤

盛竹莊處士輓章

早歲辭淞渚移家住帝鄉六龍方在御羣鳳喜鳴陽
翺翔霄漢冥冥避稻梁閒招板桂客細和考槃章神采
無瑕玉詞鋒百鍊鋼著書常滿案種竹已成莊山水供
藜杖煙霏護草堂奇才追屈宋高臥傲羲黃驚坐名何
重趨庭教有方鳳毛看擢第玉樹復聯芳共羨家聲振
由來慶澤長從知心匪石其奈鬢如霜夢熟邯鄲枕寒

生辟荔墻秋風來弔鶴夜雨泣棲凰碩德俄凋喪深情
益惋傷高山空仰止清泪欲沾裳

送許太守赴南安

翰苑才名重容臺秩望清幾年頻薦鶚五馬忽專城紫
禁分符去華軒露冕行文星南斗避卿月上江明想尚
雍雍治寧求赫赫聲文翁敷教化黃霸務寬平撫字心
無倦綏和政有成嶺頭梅早發回首寄瑤京

胡宗肅世德堂

肇跡由媯汭傳家自越州萬支原共本一派轉分流
瑗族今承宗陳封遠紹周鄧林多杞梓卞匱賸琳瑯
茁階庭秀麟從藪澤遊宦門足詩禮儒業守弓裘省
解名方顯師資望更優阿翁榮薦秀夫子樂林丘
方伯難兄貴科名令器收青雲聯濟美懿德允垂休
循理全中得為仁豈外求學皆敦古訓行總肖前修
厚澤何能斬芳聲孰與侔綿綿若瓜瓞翼翼著謀猷
喬木光閭里恩波下冕旒子孫欽厥世復始見公侯

律詩六言

送蔡明遠南還二首

三秋故國久別一臂京華乍交天上丹葵向日林間野
鶴辭巢酒汎菊英晚酌暮落燈花夜敲歸去滄江歲晚
北風為送船稍

嚴裝歸興非淺對酒離情不堪寒飈正吹客袂暮柳難
挽征驂蘭門煙樹新賞禹穴神奇舊探明發相望何處
落花芳草江南

律詩七言

寄金陵諸舊遊

書劍天涯惜解攜，偶從霄漢躡雲梯。
文章幸瀆宸睂覽，名姓親勞御手題。
天近玉堂人語靜，曉趨金闕珮聲齊。
舊遊多在長安外，幾上高臺望眼迷。

午日內賜扇并綵縷

五日垂紳侍曉朝，明時恩賚喜親遭。
彤庭新賜藍綵扇，繭館初分綵線條。
綺席瑛盤堆角黍，玉壺金盞出葡萄。

醉歸馬上仙風軟猶覺天香襲錦袍

題畫

平生幽僻愛林泉客裏看圖思渺然松磴水流花自落
草堂人去鶴空還湘潭暮靄連蒼黛廬阜晴暉散紫煙
野渡扁舟能借我擬從江上訪坡仙

和少保揚澹菴遊九龍池詩韻

神物何年去復還共留靈迹此池間怒吞海氣雷奔壑
淨漱雲根雪滿山時雨每添新漲濶晴嵐常映碧波閒

仰懷先帝登臨日，悵望垂髯不可攀。

竹軒為宋以臨賦

琅玕特立繞茅簷，清逼幽懷稱養恬。
風細珮聲來靜几，月高鸞影落疎簾。
瑤窗煙細茶翻乳，曲逕苔深筍迸尖。
何日抱琴容直造，倚闌吟嘯一掀髯。

送李檢討紹還安成

詞臣榮著錦袍歸，便覺文星闕下稀。
驥足方將開道路，鵲聲先已報庭闈。
河杳杳多秋色，桑梓依依映夕暉。

曉殿論思專有待早來同候掖垣扉

送袁尚寶忠徹致仕還鄞

善相

明時深沐寵恩偏老賦宜休世共賢青眼閱人聊戲耳
黑頭為宦已皤然公卿出餞東門祖童僕歸耕負郭田
方丈蓬壺應咫尺醉遊莫惜杖頭錢

送章進士綸畢姻還永嘉

咲帶爐薰出曉朝故園歸去賦桃夭瑤池阿母初通信
銀漢天孫已度橋龍虎榜中春擢桂鳳凰池上夜吹簫

香閨可似張京兆眉黛殷勤手自描

龍眠書舍

四簷古木數椽居一點寒燈半夜書
載酒豈無人問字到門時有客巾車
碧山雨歇朝吟後石榻雲開午夢餘
聞說昔賢勤學處或從長白又匡廬

山水畫

披圖塵眼一時醒巖磴渾疑舊日經
深樹雨餘雲滿壑危橋波漲草連汀
山屏晚稱支頤對瀑布晴宜洗耳聽

林下豈無高士隱欲攜藜杖叩柴扃

哭同年施修撰宗銘

多士同傳玉陛臚可憐先聽獨先殂空留姓字題宸翰
無復絲綸翼聖謨渺渺白雲鄉國遠冥冥長夜旅魂孤
老天速奪知何意汨灑西風只痛呼

送陳侍講中還南院

曾向鰲頭壓俊英詞林載筆久馳聲紉書舊沐蓮金寵
校藝今推藻鑑明寶殿香隨雙珮遠玉壺冰映一官清

辭朝不用傷華髮
袞職彌縫重老成

觴月樓

午夜清輝萬里同
開樽邀玩綺樓東
金波散彩明虛牖
綠蟻浮香注碧筒
汗漫神遊銀漢表
風流人在玉堂中
寒芒吸盡襟懷爽
吟就翩翩氣吐虹

送胡進士拱辰宰黔邑

鳬舄翩翩下九重
青年膺詔宰花封
滿城桑柘春風煖
百里絃歌化雨濃
枳棘暫看鸞翮翮
梧桐終聽鳳雛雛

宦遊况是頭俱黑好掬清泉淬劍鋒

送陳侍郎璉致仕還東廣

丹宸彌縫重老成那將白髮謝時名
夷夔禮樂兼能典韓柳文章竄善鳴
冠珮曉辭雙鳳闕柴桑晴望五羊城
黃金寵賜知多少賸與鄉人樂治平

寄盧廷佐

謝赴京時惠帶

石頭城下一分襟路入金臺別恨深
鄉夢空憐終夜到壽觴還意去年斟
已從元服加三祝好向明窓惜寸陰

自是臨歧情寔密故將束帶表同心

栖雲

悠悠出岫澹忘機
斂迹相依與世違
輕絮乍開風滿榻
素濤低捲月當幃
肯教碧落從龍化
惟許深巢護鶴歸
寔是蘧蘧迷曉夢
祇疑莊蝶繞身飛

壽少保楊澹菴

二月二十一日

南極呈祥瑞氣飄鶯花
二月慶良朝曉瞻台座
星偏祭
春入沙堤雪已消
彭祖壽齡方七袞
阿衡事業重三朝

化成喜際明離盛金鼎鹽梅正倚調

萬竿煙雨圖

誰斫清露染霜毫掃出瀟湘萬玉梢滿地蒼苔穿稚笋
一溪流水浸香苞風雷夜撼龍蛇窟煙雨寒傾翡翠巢
疑是南郊駐嚴蹕霓旌羽蓋五雲交

詠內閣雪山呈少保楊澹菴

玉署朝搏白鳳羣瓊山重疊望中分補天想煉蜺皇石
行雨疑籠楚岫雲雕琢豈勞經妙手品題何幸及斯文

太平有象遺蝗滅應有謳歌處處聞

幾疊冰崖擁禁堦玉堂吟對喜相宜銀屏恍自雲中敞
瑤島應從海上移爽氣晴連鳩鵲觀凍痕融注鳳皇池
鼎調深仗阿衡力寧惜差峩暫效奇

和少保楊澹菴內閣雪山詩韻

絕憐嘉瑞喜親抔頃刻參差勢自繆天姥淡橫銀抹額
麻姑全露玉搔頭六花令屬玄冥布一簣功由內相收
終潤土膏流素液南郊綵仗已鞭牛

賀馮郎中宗勗陞秩

九年嘉績著工曹起擢還應服舊勞天上承恩看委佩
風前節役聽鳴礮冬官經術明周禮水部詩名逼楚騷
清操只今知愈厲海鵬終見拂雲高

送姜太守濬赴廣南

喜分符虎荷優除作守勞君萬里餘花發玉京朝趣駕
雲開銅柱晚停車蠻津水煖漁投罟熨道風暄客趣虛
好布天恩化殊俗九夷雖陋亦堪居

送蕭編修鉉歸省

曉辭丹陛散鳴珂
詔許南歸喜氣多
柳外行裝青雀舫
花邊供帳紫金荷
月明華表應聞鶴
雨過春山正擁螺
展罷孝思還戀闕
綸闈載筆候編摩

巫山圖

壁立巫山奠蜀中
綵毫幻出萬芙蓉
嵐光映日三千仞
黛色參天十二峯
峭拔連屏秋競爽
參差羣髻晚偏濃
不知神女今何在
空說陽臺夢裡逢

雪坡為顧維周賦

鎮遠侯子

六出紛紛費剪裁侯門深積靜無埃一簾梅月朝猶在
滿地梨雲晚未開坐想琪花敲玉笋行看珠履散瑤臺
雅懷對此多清賞司馬應專作賦才

禱雨恒嶽五月一日發真定途中有懷

甲子歲

使節晨持出北門迢迢古道入荒村日烘槁壤似霜色
風盪殘沙成浪痕解渴僕夫求茗汁療飢野婦劬藜根
行看至禱通恒嶽海內均霑雨露恩

禱雨恒嶽甘澍應期喜而有作

恒嶽巍哉神所都
肇禋靈貺喜潛孚
九重正切桑林禱
一雨先回麥隴蘇
生意駸駸盈海宇
驪聲藹藹遍農夫
有秋總已資玄祐
却歎乾封是矯誣

和韻送習侍讀祠東嶽

東行泰岱屬祇祠
擬介蕃釐在此時
丹詔早從金闕下
青綾還向玉堂辭
巖巖魯望千峯秀
蕩蕩周行四牡馳
脩祀靈壇看應禱
祥飈將雨到階墀

倪文僖集卷六

欽定四庫全書

倪文僖集卷七

明 倪謙 撰

律詩七言

竹雪軒為陸元泰賦

六花萬點撲琅玕清逼幽軒稱倚闌雲母屏風金佩冷
水晶簾幕翠翹寒初驚袞袞凌高節渾訝脩脩舞素鸞
吟興頗同袁令尹徑來不問主人看

送曹子琛還句曲

弟義吏部員外郎

在原常誦鵲鷦篇視弟親勞到日邊
叙話夜牀忻對雨思歸秋旆遠衝煙
家隣弘景燒丹竈地接茅君種玉田
莫厭西風霜入鬢刀圭好乞駐流年

送賀司訓懋赴應天

本學人也

儒職清高荷美除南還榮養有誰如
官居魯泮諸生表家近秦淮半里餘
前絳雨霑新背笈北堂花擁舊肩輿
懸知講罷歸來晚綵服烏紗憫倚閭

分題得泗亭懷古送友別

艤棹閒登泗上亭，殘碑猶載舊時銘。
鹿亡自合歸隆準，蛇斷何為泣素靈。
芒碭山頭雲漠漠，沛豐城下水泠泠。
大風急起歌臺暮，舟子開帆未肯停。

洒墨軒

幾載臨池事偃波，玄霜一握手輕磨。
揮毫遠法宣王鼓，掃素曾籠逸少鵝。
飛絮落花春欲老，問奇載酒客頻過。
只愁殺盡中山兔，芳草纍纍筆塚多。

送宋尚寶懷赴南京

拜官南去沐恩休清貴明時第一流
遠道高風秋氣肅長江霜落水痕收
職司御璽雙龍紐身近皇家五鳳樓
從此兩京佳麗地扁舟來往屬遨遊

送殷主事謙書最南還

海上星槎夜入河天門獻績沐恩波
鳳麟終合歸靈囿龍虎猶歆擅甲科
寶殿雲開辭負展石城雪霽想鳴珂
臨岐為有同年舊笑看豪曹意氣多

次韻荅內弟姚秉常

儒冠何物是生涯
插架牙籤理復斜
月桂好分天上種
霜毫應發夢中花
文章著述逾千首
經史冥搜近百家
愧我無能居散地
遲君高會際亨嘉

行人成君始終寄
江夏胡先生詩二首用韻寄荅
乘舟仙客漢川回
枉示封題手自開
鳳髓龍團勞遠寄
建溪顧渚不須猜
麝泉旋煮軒轅鼎
酌酒且傳鸚鵡杯
甦息蒼生知有志
鳴珂蚤晚日邊來

人生萍梗受風吹踪跡分飄底用悲碧海鱗鴻傳錦字
清秋鸞鵲見冰姿為師喜有胡安定知己豈無鍾子期
鈴閣玉堂清切地抽毫來與共論思

徐進士父挽詩

思親有堂橘有軒苔封石徑無塵諠持竿隨處坐臨水
抱壘或時行灌園服鳥三冬止蘿屋鳳鷄五色翔薇垣
遠道奔哀泪如雨莫向月明重聽猿

筠川書屋為清河太守致仕李君賦

一川寒玉水沄沄晚節高風對此君
藜杖醉吟三徑月
角中間步九臯雲碧窗燈影穿林見
石榻琴聲隔岸聞
治郡功成身早退
賢名千古重斯文

雲我軒

素濤一榻洗煩襟
兀坐相忘契誼深
入戶往來如有約
隨時舒卷共無心
端期捧日丹霄上
還擬從龍碧海濤
欲訪岩棲不知處
曉猿夜鶴伴秋陰

壽醉畊老人

七月四日

老向青山友鹿羣養高林壑不求聞一壺常醉床頭酒
數畝閒耕隴上雲碧漢壽星晴晃曜玉爐香篆暖氤氳
郎君綵服承懽好為問秋光到幾分

蘭學士輓詩

碧山泉石賦歸休俄共耆英地下游老去葵心猶向日
病餘絲鬢豈禁秋南宮閱卷思甄拔東閣揮毫憶校讐
媿是門生情倍感無從雙涕奈橫流

陳恭侍郎父靜誠先生輓詩

九霄雲盡六龍飛
啓沃深勞補萬機
鳳駕屢過諸葛徑
魚竿獨慕子陵磯
朝端勛舊俱丹轂
馬上山人尚白衣
完璧莫傷歸夢早
聖皇諭祭古今稀

儒門奕葉舊簪纓
高步風雲際聖明
剪刈羣雄資翊贊
奠安四海屬經營
生前節義辭高爵
歿後哀榮冠列卿
媿我鄉人生最晚
清風時仰靜誠名

國子吳檢討先塋四景之二

楓橋月落

吳江楓落水通橋斜月將沉斗轉杓兩岸秋聲隨籟發
半蓬寒影帶波搖漁舟乍起吹殘火估舶爭開趁早潮
幾度吟詩憶張繼鐘鳴山寺夜迢迢

寒寺鯨音

招提遙隔闔閭城夜半蒲牢吼地鳴度巔微分山市曉
穿林偏帶野泉清高低覓徹三千界次第頻連百八聲
獨有思親情倍感鳥啼月落夢魂驚

松月軒

偃蹇長松拂四簷瑤空移上海東蟾金波湛湛光浮榻
蒼雪霏霏影入簾老鶴驚寒時振羽怒虬終夜自垂髯
幽人對此渾忘寐一任更深漏轉籤

和王廷器檢討夕讌李揮使東軒詩三十首

并序

承示傑作捧誦之際若宴人子入市睹寶貨駢集不覺
目眩心掉然業已許和故不揣駑劣廢一夕之寢強成
其數錄奏廷器翰長宗大揮使非敢言詩第欲踐言云
耳

賓主論文對酒卮燈前傳令影交馳香雲拂座元無定
華月窺簷似有私李廣雄韜予所慕王維佳句世同推
明時幸接丹霄羽致主黃虞敢共期

坐對雲屏不啓闕恍疑蓬島在人間錦衣華胄多君武
玉署清資羨客閒取醉漫勞新酒勸諧歡頻用巧辭訕
祇應義重能延欸不放花廳步月還

繁絲豪竹弄新聲絳蠟光分綺席明投轄已拚厭此夕
飛觥何惜到殘更酒酣風月胸中滿詩就雲煙紙上生

憶昔洪都高客賦獨誇王勃竄先成

詞源浩瀚瀉三江百斛龍文筆可扛藝苑雄才君獨步
吟壇勍敵我須降銀絲細斫吳中鱸玉管新番塞外腔
昭代行看樹勲業隱居誰羨鹿門龐

遠寺昏鍾已罷撞錦袍黑髮映明缸清歌聲度黃金縷
法酒香浮白玉缸笑語送闌人隔座豪呼博塞月盈窗
良宵懽會惟三益此樂人間信少雙

為問潛陽幾日歸談玄渾訝泄天機醉狂始覺醒來好

今是方知昨已非
莫向蒼龜占否泰
且從裘馬共輕肥
深情能保如膠漆
青史陳雷繼有輝

開軒待月費吟思
詩律曾推一字師
宴樂盡拚今夕醉
功勲須及少年時
名駒未試誰能識
良賈深藏世寡知
但使酒腸寬似海
何妨連進紫金卮

奎壁方中北斗高
謫仙醉著錦宮袍
庭松月浸蒼龍骨
檻竹風梳紫鳳毛
杯送蘋霞歌宛轉
爐圍紅玉坐周遭
賞音可羨徐東海
一曲冰絃動譽髦

寶鼎龍涎散碧雲劍橫秋水自隨身月華墮地明如晝
火氣當筵煖似春飲酒每歌魚在藻感時又遇鴈來賓
醉中和得迎仙曲鳳琯吹將向玉宸

座上金蓮徹夜開故人相遇且銜杯一庭霜月醒殘醉
萬里風雲入壯懷分閫佇看持節鉞調羹須是用鹽梅
結隣若許通幽徑不惜移樽日笑陪

千金結客重交遊詩酒相忘不解愁汗簡細評科斗篆
仙闕疑接鳳麟洲馮驩客裏須彈鋏王粲吟邊獨倚

樓誰似此軒幽絕處高歌取醉倒瓊甌

貂裘坐擁不知寒月轉瓊筵捲幔看羌笛且教停折柳
瑤琴謾聽鼓倚蘭圖形擬上麒麟閣執法休論獬豸冠
豪客新詩三十首錦箋書就墨華乾

將軍能武復能文書重羊欣白練裙韜略已看推巨擘
旂常行見紀元勲肯將節操炎涼改賸有聲華遠近聞
況是東軒多勝賞新題時與故交分

石屏積翠喜淩霜遺戒誰曾效贊皇九曲峯巒爭起伏

四時松竹共青蒼
開軒久玩情偏爽
把酒閒吟夜正長
醉後不禁喉吻渴
霜柑細嚼紫香囊

子喬飛鳥下西清
來聽古桐絃上聲
玉椀香雲傳茗汁
金盤丹魄薦芝英
鳳麟酸吐烏銀屑
牛斗光騰寶劍精
却羨主人能飲客
酒行只用兕為觥

碧天孤月起東林
人在重門畫閣深
吟賞每招諸友共
清幽不受一塵侵
瓊卮爛醉鑪頭酒
彩筆親題漢上襟
坐久但聞香貫腦
涼煙如穗裊檀沉

金猊添火爇香塵酒入歡腸不醉人
奇石喜看三仞玉
早梅誰寄一枝春
紫檀鉞撥繁聲急
彤管雲箋麗句新
散步虛庭霜月冷
清風嫋嫋動垂紳

封侯萬里建旌旄
今見班超骨相高
小帳金杯淹翠袖
長檠絳蠟照緋袍
今宵痛飲寧辭醉
他日攄忠肯憚勞
會使燕然重勒石
功名端的冠時髦

琅玕玉立俯清渠
歲晚珊珊繞燕居
客到閒從林下飲
詩成多向節間書
九天風月瞻光霽
一氣陰陽驗慘舒

賓主交歡何所似依依綠水汎紅蕖

滿注葡萄甕裏春開軒劇飲見天真
菲才自愧登金馬壯節君看剖玉麟
燈下呼盧人影亂庭前貫韋月華新
吟壇強和驚人句夢入池塘覺有神

姓名早晚出金甌秉燭何妨入夜游
舞曲有腔頻換譜酒杯無筭不論籌
閒中運甕思陶侃醉裏彈碁笑奕秋
逸豫每能存惕厲行藏隨處沐天休

賓主相看共眼青喜聯冠珮侍彤廷
多材俱羨成奇器

馳譽爭誇正妙齡
鳳竿深浮千日醞
鸞刀細簇五侯鯖
及時懽賞真明達
莫待霜華短鬢星

碧落驚寒鴈影疎
東窓月上捲簾初
已成霧雨南山豹
須化風雷北海魚
午夜偏能娛盞斚
三冬知不廢琴書
明朝我試來相訪
一榻清風醉夢餘

胸襟瀟灑更疏通
燕喜應知有古風
一曲清歌番子夜
百壺春酒醉新豐
更收殘漏霜初下
雲度輕綃月淡籠
千載南樓傳故事
庾公高興與今同

斗室幽清自不羣日華常映海東雲麝煤入鼎浮香篆
蛇腹橫琴散斷紋每喜三冬頻會友誰云一飯敢忘君
却憐月夜霜華冷凍損琅玕瘦幾分

碧海鳥沉暮景昏東君娛客管絃誼年豐已卜經三白
陽長方當會一元鶴髮喜喜瞻南極粲丹心常仰北辰尊
貂裘綉褥圍爐坐誰道連床席未溫

佩玉鳴騶總俊賢詠諧探蹟更鉤玄酒開臘蟻清歌送
菜簇冰絲玉指傳楫杓煖煨霞滿座闌干醉倚月當天

蘿闌一徑殊幽僻絕勝王維舊輞川

良宵踏月遠相尋翠壁踈簷助細吟度曲不須敲象板
賞音惟許操瑤琴佳人慣索纏頭錦公子閒拋買笑金
宋玉高堂曾有賦麗辭傳誦到如今

酒酣耳熱臉生紅劇辯高談四座空繁弱笑彎何慷慨
豪曹獨拊自英雄清音嫋嫋頻吹竹爽氣飄飄欲御風
醉倒祇應同枕藉日華還待出籬東

夜永銅龍滴水遲玉壺春酒送青絲鸞笙細咽渾忘醉

鱸膾分嘗憫所思
虎衛將軍偏愛士
詞林仙客每留詩
何當一拜高堂上
壽母親稱百歲庖

送古廉李祭酒南歸

立朝四十有五載
名節赫然聞九州
請老許從今日去
効官真與古人侔
喜看羣弟上封疏
即詔有司供驛舟
聖主虛心思舊德
乞言還見起林丘

覽秀舫分題得番陽湖

番湖風靜水無波
此日曾乘畫舫過
萬頃天光澄素練

金匱山房詩集 卷七
一拳山色湧青螺，朗吟赤壁蘇仙賦。
閒和滄浪孺子歌，佳勝經行宜縱覽。
應知清興倚蓬多。

送張驛丞

明時作宰向雷塘，薄宦那知謫遠方。
身事不須驚寵辱，人情何必歎炎涼。
一雙白壁元無玷，百尺青松老更蒼。
萬里澠池終奮翼，重登朝著詎能量。

扈從謁陵十詠

正統戊辰春二月也

駕出都城

二十六日壬午

鑾輿曉發帶春曦，
銖鑿桓桓起六師。
御路塵清森虎輦，
神皋風暖掣龍旗。
寢園祇薦存周典，
原廟修祠陋漢儀。
濟濟公卿扈仙蹕，
不才何幸亦追隨。

沙河駐驛

曉駐旌旗遍野紅，
貔貅百里衛行宮。
山連北極三千仞，
身在中堅十二重。
散騎徐牽金絡馬，
將軍齊帶寶琕弓。
八珍已進天厨膳，
甲帳彈碁啜紫茸。

御營啓行

御營五夜發沙頭滿路金蓮散不收天外長風驅鉄騎
海東初日耀戈矛花香遠逐龍涎噴草色低承鳳輦游
聖德神功彌宇宙萬年玉刻護松楸

寢園祇謁

二十七日癸未

翠樹重重寶殿開五雲常日繞蓬萊繞趨玉座函香進
忽報黃麾導駕來下輦還須中使引合班不待禮官催
鼎湖悵望飛龍遠空抱遺弓泪滿腮

恭陪大祀

二十八日甲申

人間節序屬清明天上時思軫聖情法從班連庭陛肅
梁盛香拂几筵清禮嚴陟降終三獻孝格幽明在一誠
此日微誠陪祀享只歌潛頌答昇平

侍閱軍容

聖皇閱武禁門西翠葆威蕤簇仗齊雲擁旗旛輝日月
雷轟笳鼓振山谿材官結隊皆羅虎寶馬成羣盡馭騏
勲業由來輸衛霍却慚簪筆侍金閨

銀山從獵

二十九日乙酉

日上千峯紫霧消
銀山蒐獵按鑾鑣
露香芳樹攢紅錦
風淡長楊暉翠條
迥野鳴鞘圍萬馬
層空飛箭落雙鷗
從官誰道相如吃
賦就凌雲氣獨飄

龍池錫宴

三月一日丙戌

水殿筵開對碧峯
大官頒賜拆黃封
方壺縹緲環三島
靈瀑鏗鏘噴九龍
在鎬昔聞同豈樂
奔流今見總朝宗
幸逢上巳當修禊
分得恩波似酒濃

輦道回鑾

初二日丁亥

三陵辭罷啟高牙振振還宮輦路賒上將方移行殿壘
前郊已駐曲河沙九天日馭臨黃道萬乘霓旌擁翠華
時喜昌平賢父老爭持牛酒進官家

北郊迎觀

初四日己丑

清道龍驤已載途甲光映日似銀鋪百年禮樂逢昭代
萬古山河壯帝都朝士蕃王齊覲謁黃童白叟競攜扶
詞臣歸從鑾輿後惟聽嵩高振地呼

倪文僖集卷七

欽定四庫全書

倪文僖集卷八

明 倪謙 撰

律詩七言

卧雲重題居處謚卷

一枕悠悠卧翠微
白雲滿地掩柴扉
迎風疑化蒙莊蝶
汎月誰收玉女衣
有夢終同玄豹隱
無心遙接紫鸞飛
欲分半榻陪怡悅
莫道紅塵未息機

賀盛叔大陞御醫

醫國神功奏十全
新承雨露日華邊
清資喜到金閨籍
素問多傳玉版篇
曉月禁垣雙佩入
春風都市一壺懸
幾回欲覓燒丹處
紅杏林深虎正眠

聶司訓玩芳亭

玩芳亭子泮之涯
身在毘陵即是家
促席翠煙浮絳帳
倚闌紅雨濕烏紗
秋香籬落陶彭澤
春草池塘謝永嘉
莫向西風歎消歇
雪橫牆角看梅花

次盧廷佐寄來詩韻

青春去後幾時回
銀漢仙槎待子來
卞玉且為藏匱器
蠡舟終是濟川才
秋風北渚歌遺珮
曉日南山詠有臺
忽睹雙魚傳尺素
吟看懷抱鬱難開

宣聖五十五代孫孔克愚輓詩

徒錢塘

闕里移家住海鄉
系分沂泗遠流芳
壁中舊簡存蝌蚪
牆際邊宮識鳳凰
放鶴亭空湖雪冷
採芝歌斷野雲荒
百年一枕錢塘夢
瀾瀾寒潮送夕陽

同王侍御飲東郭草亭

并序

侍御王公滿績書最四月六日謙持酒往賀至則棘寺
沈先生草窓劉先生內翰徐先生憲愼陳先生已先至
置酒東郭草亭之上侍御遣人來速遂往同罄一歡退
而賦此以紀其勝

楊卿亭子郭之東此日能來笑偶同綠酒旋移花底榼
玉珂遙駐柳邊驄雅懷喜遇王文度末席叨陪太史公
醉後聯鑣歸去晚麗譙猶帶夕陽紅

送彭狀元弟純正還安成

阿兄喜中龍頭選難弟能諧鴈序情天上客床方對雨
沙邊官棹已開晴黃花籬落家千里紅葉關河路幾程
歸去寧親知有暇書齋良夜賦秋聲

送楊編修假御史職僉兵兗州

天書晨下紫泥封奉使旬宣向兗東深仗干城當閭外
足知兵甲在胸中蓬萊久載詞臣筆海岱俄乘御史驄
萬里封侯談笑覓旂常行見策元功

題劉季康綠筠書屋

半畝多栽綠玉叢
小軒深結路斜通
疎林細雨兒孫長
高節清風父子同
鸞影常時翻簡帙
珮聲良夜入簾櫳
鄉人相訪應相訝
只道秦淮是剡中

世醫堂

一家醫術妙通神
心地俱懷利濟仁
肘後方書傳父祖
囊中藥物備君臣
丹砂夜伏芙蓉鼎
紅杏春鋪錦繡茵
試問白頭無恙客
幾多先世受恩人

送蕭都憲啓出鎮山西

緋袍金帶拜恩光
玉節青驄入晉陽
疆域廣輪連朔代
土風勤儉自虞唐
三秋碧漢西飛鶚
五夜威弧北射狼
邊務方殷君暫去
歸朝還擬振臺綱

宴仁和聶廣文東軒次劉邦彥韵

景泰辛未

東軒曲宴薦南嘉
寂喜斯文會一家
青珮執經時問字
蒼頭隔竹午敲茶
床邊酒熟開銀甕
窗下香清繞碧紗
醉後高歌雙耳熱
月鉤從上紫薇花

遊寶石峯次邦彥韻

積雨初收日已高
湖光潏灩欲平橋
幽禽繞樹番歌舌
細柳沿堤學舞腰
山水盡為金相窟
衣冠曾是紫宸朝
登臨不用懷前古
儘放春醪入翠瓢

過嚴先生釣臺

深隱層臺把釣鉤
獨將名節傲王侯
故人大度符高祖
夫子清風邁許由
已有衣冠盈鳳闕
何須軒冕換羊裘
客星自落桐江上
千古猶能姓此州

水竹幽居為唐克敬賦

移家久傍賀蘭山下得幽居水竹間
冰鏡光涵丹鳳尾翠雲陰護白沙灣
雨濤夜鼓溪頭漲風籜晴抽谷口斑
有待叩門叅玉版小舟乘月弄潺湲

途間贈王都憲公度

禁垣憲府歷亭途慷慨當朝翊廟謨
大節一生存正氣元亢萬死有餘辜
邊塵汎掃收戈甲國計常充送舳艫
勲業豈徒垂太史丹青麟閣看新圖

劉司訓產雙生子題蘭桂同芳卷分韻得徐字

明月雙擎掌上珠
蘭香桂馥謁庭除
為奇為偶數元定
寢地寢床歡有餘
昨夜紫光方照室
今朝佳氣又充閭
行年四十非為晚
賦命應知有疾徐

和許太常彬宅賞芍藥詩韻

零落殘紅逐砑光
君家庭院有餘芳
花凝曉露胭脂濕
葉逗薰風蜚翠香
低傍畫闌爭逞艷
遠勝砥柱獨回狂
只疑昨夜嘉賓散
遺却尚書紫荷囊

送吳司務天爵從蔣都憲巡撫貴州

萬里巡邊佐憲臣
春風一鶚振青雲
榮循舊是江東俊
溫石今空冀北羣
百粵停驂消瘴雨
五溪飛檄靖妖氛
化行徼外恩威布
應向明時早策勲

劉醫官原博輓詩

號草寇能詩

蚤繼簪纓賦蓼蕭
奇材雅望重清朝
國風共許千年在
劍氣俄驚五夜消
濟物參苓遺藥籠
傳家珠玉富詩瓢
春來綬遍王孫草
堪歎吟窗閱寂寥

挽葛節潤

并序

予與句容葛節潤節文兄弟交非一日矣皆文雅篤行
誼節文商於江湖客死陝右予哭之前年予過句容嘗
主節潤今別甫二載其子濂來京始知其已於去歲卒
矣又得不哭之慟乎故賦此以寄予情之哀

君家兄弟玉連枝何事霜風數見欺客路舊憐歸櫬遠
鄉關今痛計音遲一朝永訣成千古兩地相違僅二期
有酒莫澆原上土鳳毛相對不勝悲

送徐瑄御史按蜀

繡斧分巡出鳳池使星五夜拂參旗岷峨江水元通楚
邛笮民風舊近夷諭蜀豈勞司馬檄入夔應憶少陵詩
臨岐不盡同年意佇看澄清體睿思

送鎮江錢醫官

拜官歸去沐恩偏醫國功應奏十全藥自楮鞭知異品
方從金匱得真傳鍊砂尚仗爐中火摘橘還分石上泉
為想江城春市裏杏花如雨一壺懸

景泰壬申九月初六日經筵講退蒙召至文華殿
皇上負宸而立面垂顧問賜楮幣一千貫復遣中
官賜雪花梨及鮮果一籠荷恩感激賦此以識

中官宣召入文華虎拜丹墀沐寵嘉雙玉不移留獨久
重瞳屢顧語尤賒內庭翠楮裁雲葉上苑仙梨釀雪花
仰荷恩頒深感敷天光輝赫照貧家

送周德元還崑山以文學舉阻於例而歸

冥鴻風便偶高騫路阻雲程又五天故國迢遙足歸夢

禮羅踈濶竟遺賢莫言張翰尊偏美須信相如璧自全
寄語山靈勿相拒草堂已賦卜居篇

題畫贈平江侯南京鎮守

久鎮清泉著廟謨召還仍命守南都金龍灑翰新頒勅
銅虎臨戎再剖符萬井蒼生霑霈澤一心清節湛冰壺
分攜辱在相知後聊寫微情寓畫圖

送李保章宗善

太史三年謁帝廷言歸秋日正冥冥霜霑行李城南路

風引征帆泗上亭金闕雲霞朝倚漢玉衡斗斗夜占星
重來洗耳談天術漏咽巖扉擬共聽

送張節之主事赴南臺

悵別音塵十五年青雲科第愧盧前兩京兄弟誰能及
一榜交親子獨賢曉日朝端雙珮委薰風江上片帆懸
官曹見說清如水賸有新詩白下傳

送吳中進士知清流縣

除目新頒出鳳樓榮看宰邑向清流莫言虎榜三春客

只博花封百里侯
天上聖心需撫字
海濱民力困誅求
君家宦業多循吏
會見功名指日收

送童軒給事還南京

金榜香名擅甲科
夕郎三載近鑾坡
青年賈誼才華富
素悃匡衡諫疏多
兩袖天香丹鳳闕
一帆春水白鷗波
錦遊鄉國真堪羨
把酒臨歧柰爾何

江湖勝覽為王景和賦

萬里江山一短篷
壯遊隨處豁雙瞳
三湘洲渚推敲外

百粵風煙笑傲中赤壁夢回秋月白金臺望斷夕陽紅
京華刮目鷺相見非復東吳舊阿蒙

謝定襄伯郭公登惠馬

渥洼神駿齒初齊惠我來從紫塞西素鬣梳風流電疾
玉花照夜白雲低千金未許論高價萬里何當試逸蹄
從此朝天騎去穩不愁風雨汨塗泥

題竹

金壺素楮墨淋漓寫出扶疎帶雨枝湘浦啼痕秋作點

淇園翠色晚含滋
窗前把酒閒吟處
蓬底停橈獨聽時
滄海新波添幾尺
長竿欲繫釣鰲絲

詠寶劍贈董侍御

身佩吳鉤百鍊鋼
芙蓉出匣耀寒芒
斷蛟直欲趨東海
斬馬何勞借上方
怒斥姦邪驚落膽
氣凌豪俠凜飛霜
平生致主憑三尺
星斗遙看夜有光

劉詹事宗器挽詩

先生廉介著孤標
步玉登金志不驕
久擅文名高一代

曾揮史筆記三朝
曾筵德望追前哲
宮尹清班接上僚
委蛻脩然成永訣
芳魂空賦楚辭招

寓宿大勝寺詩次韻

景泰七年冬至陪祀三陵輿地官楊亞卿同賦

清曉聯鑣駐寶林
禪房花雨坐來深
上卿酌酒陪高論
老衲焚香話夙心
供食頻分香積飯
聞經時渡海潮音
不因修祀承朝命
此地何由共盃簪

題周秩教諭哭兄詩卷

見說君家好弟兄
弟伯堦聲斷幾朝昏
紫荊堪恨花先隕

義竹空悲節自存鴻鴈秋風吹別思池塘春草役吟魂
詩成要識情深淺衫袖重重是淚痕

送胡克容上舍南還

挾策聊為上國遊故鄉歸去屬深秋黃花佳景多清思
青鏡流年正黑頭科目從知非力取功名須信待時收
相如珍重連城璧他日重來價定酬

送柯狀元歸省

新改尚寶少卿

宮花六見落廳槐鄉思臨風不易裁舊業暫容辭翰苑

新銜却喜換符臺名從黃甲掄魁早身約青春作伴回
綵服寧親多樂事祇應清夢繞蓬萊

西池草堂為周儀賓英壁賦

西池池上草堂幽門對波光一鏡秋卜宅也知同杜甫
觀魚聊復似莊周懷人高興歌沅芷玩世閒情狎海鷗
白藕作花真可愛家聲無忝紹前修

挽何忠節和何太守澄韻

碩德長材素有餘豺狼寧意與同居長弘不化千年血

蘇武空傳萬里書義重丘山惟自守光爭日月許誰如
皇家錦誥褒忠節奕奕雙桓在故閭

題楚府于教授菜圃卷

躬曳長裾也自嘉却從老圃託生涯漢陰抱甕無機事
浴缺蹲鴟有歲華紫芥放花晴舞蝶碧茄成子雨鳴蛙
閒來如作冰壺傳露夜黃塵謾自誇

送韓賜布政致仕還越

陽春到處輒回蘇老去辭榮乃丈夫已負盛名垂汗簡

只餘清節湛冰壺歸田早辦歐公錄賜地應分賀監湖
鶴骨松姿行益健幽尋不必倩人扶

輓薩侍郎琦

喪子

翰苑編摩二十年容臺典禮荷喬遷為臣報國才須盡
哭子還鄉病已纏四尺孤墳嗟自掩一槭遺藁竟誰傳
可憐宦達俱成夢追憶平生倍愴然

送周先生分教崖州

缺崖南涉中洲此去傳經是勝遊月映珠光渾有淚

雲連蜃氣摠成樓莫言土俗無黎獠會使儒風變魯鄒
有待化孚趨覲日恩波重沐鳳池頭

壽徐溥編修父六十號荆南漁隱

荆溪之南有漁叟手理釣絲今幾霜秋風擁簑蘆葉老
春雨放棹桃花香六旬華髮介繁祉七月綺筵生嫩涼
玉署賢郎致遙祝壽辭為寄水雲鄉

和內閣李學士賞花詩

并序

文淵閣前花砌舊芍藥三本頻年萎不自振天順二年

首夏五日敷榮暢茂開成深紅淺紅淡白三色者八朶
重樓累萼粲然奪目閣老冢宰李先生置酒邀院長彭
呂林李劉錢六先生共賞予亦幸聯席末會者八人適
合花數冢宰以為花既異常名亦不可襲舊宜製佳號
以寵之乃名淺紅者曰醉仙顏劉先生以為合用玉堂
盛事為名以別凡品遂名淡白者曰玉帶白蓋以表冢
宰之榮賜也予竊名深紅者曰宮錦紅亦用李供奉故
事冢宰乃作詩一章連和九章以倡筵開獻酬賡詠盡

醉乃散翌日諸先生和章次第皆就予才愧踈拙勉和
十章敬用錄呈教正乃幸

青宮出閣正年芳禮苑先當習太常翰學八人期會合

宮花一夜巧鋪粧珍羞旋簇筵前綺金印初封肘後黃

獨樂爭如能與衆共將高詠送清觴

是月八日東駕文
華殿開講先期三

日諸學士相會習儀
而此花適開故云

玉署藏春發舊芳細推花數象網常八枝相應攢新朵
三色齊開逞盛粧嫩葉翻風梳鴨綠香鬚傾日撚鵝黃

非才何幸承清賞到手寧辭漱澀觴

三種天葩各獻芳策名容可襲凡常錦拖宮樣袍初製
玉琢瓊華帶始粧放蕊競當炎夏赤託根終近省闌黃
顏紅更愛羣仙侶霑醉瑤池阿母觴

少年曾探杏園芳今見名花憶往常綵繡蒸霞濃有態
玉盃擎露淡無粧華筵懽賞傾醽醁佳句賡吟寫硬黃
氣運隆昌吾道泰靜觀物理謾傳觴

兆協文明夏始芳昔賢何乃視為常鳳池培得千金種

鰲禁堆成百寶粧近侍曾聞亞姚魏品題今喜賴蘇黃
調高春雪知難和引興還須酌巨觴

四朶圍金昔吐芳八花簇錦勝閒常梅詢謾說薰香袖
何晏徒勞傅粉粧地切清華依日月氣鍾靈異本玄黃
不須遠論韓公事千載能無慕此觴

太史揮毫紀異方意同麟簡不書常數符元愷知呈瑞
會集獲龍為洗粧內省花容真富貴詞林才氣總驪黃
吟安獨愧偏疎拙舉白堪浮綠蟻觴

省藥元超百卉芳幾年寥落喜歸常士逢聖主垂情眷
花被天工着意粧壺譜雅歌鳴魯薛詩盟高會及江黃
太平宰輔仙儒輩自合公餘醉玉觴

藝苑英華久漱芳連篇捧誦句超常不資詩伯風騷體
爭懌花神錦繡粧玉液滿斟恩露渥紫微高應德星黃
時和已卜豐年象後樂何妨各盡觴

勝日追陪與宴芳會開真率具家常暢懷內酒頻斟酌
照眼仙姿任點粧寶篆當筵焚吐白玉瓶堆案拆封黃

明年此際期重盛問訊花神酹一觴

清溪蘸玉便面為孫廷璧戶侯題

玉枝半落水晶宮冷浸琅玕翠色濃照影疑翻丹穴鳳
騰身驚化葛陂龍淩波仙子煙中度解珮湘妃月下逢
一握清風欣入手灑然涼意滿襟胸

送支立司訓京闈較藝畢還毗陵

麟經褒貶究宣尼較藝京闈屬命題深院下簾朝品藻
明窗批卷晚然藜桂香偏喜從人折日色寧教過眼迷

鄉榜已開公道顯此行清譽許誰齊

贈朝鮮陪臣工曹判書朴元亨還國

曾於文字久相知賦敵楊雄思不羈
楚國包茹頻入貢虞廷彩鳳喜來儀
東藩地遠山川隔北闕天低雨露垂
歸去觀光知有得襟懷應負子長奇

倪文僖集卷八